

**ՔՅԱՍԻՔՆ ՈՒ ՀԱՐՈՒՍԸ / Հայ ժողովրդական հեքիաթներ, Հատոր VIII / Գուգարք (Լոռի),
Լոռու բարբառ (խոսվածք)**

Հարուստի ու քյասիքի հողերը իրար կշտի ա ըւմ: Մի տարի էրկունսն էլ իրար հետ վարըմ, ցանըմ են. մի քանի ժամանակից եղը քյասիքը գնըմ ա տենըմ իրան արտը լավ դուս ա եկել, համա հարուստի արտըմը գատ չի կա:

Էս քյասիքը վեր ա կենըմ գալի հարուստի կուշտը, ասըմ ա.— Այ մարդ, իմ արտը շատ լավ դուրս ա եկել, համա քու արտըմը գատ չիկա, մի գնա տես էդ ի՞նչ բան ա:

Հարուստը ձին նստըմ ա գնըմ մտիկ անըմ, տենըմ ա դուզ վեր իրան արտըմը գատ չիկա, համա էդ քյասիքի արտը սանդրած, շարած կաղնած ա:

Սա միւելի ման ա գալի, պտտվըմ ու գալիս ա քյասիքի կուշտը, ասըմ ա.— Արա՛ քյասիք: Ասըմ ա.— Ի՞նչ ա:

Ասըմ ա.— Դուզ են ասել, վեր քյասիքի կլխին խելք չի ըլըմ. բա նա քու արտն ա՞, վեր դու ասըմ ես՝ իմ արտը լավ ա դուս եկել, քունը՝ չէ, ասըմ ա,— հա՛, ա շան տղա, քունը էն ա, վեր միջին գատ չիկա, էն վեր խելքը կլխին մարդը կիվատի, վեր հարուստի արտըմ գատ չի ըլի, աղքատի արտըմ լիքը ըլի: Վեր տհե ըլի, էլ խի՞ ա նա աղքատ, էն ա նա էլ հարուստ կըլի էլի:

Նա ասըմ ա.— Չէ՛, էն ա քունը:

Նա ասըմ ա.— Չէ՛, քունը էն ա:

Սրանք շատ են դլմաղալ անըմ, իրար հետ գալիս են կաթողիկոսի կուշտը, հարուստը մտնըմ ա թաքուն կաշառում, ու նոր իրար հետ մտնըմ են բողոքըմ. կաթողիկոսը ուզըմ ա, վեր աղքատի արտը հարուստին տա:

Ասըմ ա.— Գնացեք ձեր տները, եզուց սհաթի վեցին ով ըստի ըլավ, նշանակըմ ա էն լավ արտը իրանս ա:

Հմի էս քյասիքը մտածըմ ա, ասըմ ա.— Նա ձիով շուտ կգա, բա ես ի՞նչ անեմ:

Սա մտիկ ա անըմ, տենմ ա հարուստն ու կաթողիկոսը քչփչում են, էդ հաղաղին դա թաքուն մտնըմ ա կաթողիկոսի թախտի տակը:

Քշերվա մի վախտը մի կնիկ մի բոխչա կապած գալիս ա սրա կուշտը, ասըմ ա.— Կաթողիկոս ջան, Կիկոսիս փսակըմ եմ, տերտերը թուխտ չի տալի, վեր հրսանիք անեմ, խնդրըմ եմ մի թուխտ տաս, վեր տղիս փսակեմ:

Ասըմ ա.— Օրշնյալ տերտերը ճիշտ ա արել, երևի չի հասնըմ:

Ասըմ ա.— Հասնըմ ա:

Էդ կնիկը շատ սիրուն ա ըլմ, կաթողիկոսի աշկը ընգնըմ ա էդ կնգանը:

Ասըմ ա.— Օրշնյա՛լ, դե բի իմ Կիկոսն ու քու Կիկոսն էլ իրար հետ փսակենք:

Էս կնիկը առաջ չեմ ու չում ա անըմ, համա դե տեղը նեղ ա, ինչ անի, համաձայնվըմ ա:

Էն քյասիքն էլ ամեն բան տենըմ ա:

Ըռավեղը շուտ աղքատը դուրս ա գալի, ասըմ ա.— Ես էկա:

Հարուստը գալիս ա, ասըմ ա.— Ես էլ էկա:

Նա ասըմ ա.— Ես եմ շուտ էկե:

Նա էլ ասըմ ա.— Ես եմ շուտ էկե:

Կաթողիկոսը ասըմ ա.— Դու ե՞ փ ես եկել:

Աղքատն ասըմ ա.— Օրշնյալ, ես էն վախտին եմ եկել, որ քու Կիկոսին ու էն կնգա Կիկոսին իրար հետ փսակեցիր:

Կաթողիկոսը վախից ասըմ ա.— Սո՛ւս, անիծվես դու, անիծվես, գնա՛, գնա՛, էն լավ արտը քունն ա: